

ORIGEN RIOM: visita digls ministers da cultura

Ena vischnanca plagn ministers

pb. Igl premi «Wakker» per Origen n'è betg angal sto ena tgoscha da resung naziunal. Marde passo on anturn 70 ministers da cultura dall'Europa fatg visita a Riom. Els on laschea s'infurmar curtamaintg sur digl Festival Cultural Origen ed èn stos incantos.

Igl WEF a Tavo n'è betg restranschia sen igls deis uffizials. El patta gio las sias sumbreivas davantor. Uscheia ò chest onn cunsigliar federala e president dalla confederaziun, Alain Berset anvido per igls 21 e 22 da schaner igls ministers da cultura dall'antiera Europa a Tavo. Igl intent era da relascher ena declaraziun per mussar veias e pussebladads scu tgi la ota cultura da construcziun an Europa saptga neir francada da maniera politica e strategica. La visita a Riom è stada curta. Ed anc ins è rivo passa en'oura pi tard tgi annunztgia. Matagn en po perveia dallas veias precaras ed en po perveia digl program. Ed ansomma era chesta visita a Riom mianc preveida. Chegl è stada pitost ena decisiun spontana.

Schi discurrign dad anturn 70 ministers, alloura eran chegl betg gist tots ministers, mabagn tranteraint er secretaris statals ed otras persungas digl entourage digls ministeris.

La delegaziun è betg neida manada a Riom da cunsigliar federal Alain Berset. El è resto a Tavo, essend tgi el veva scu hospitant da darveir igl de siva igl WEF. An sies pe è neida la directoura digl uffezi federal per cultura, Isabella



Ainten las steivas dalla villa Carisch èn igls ministers ed igls secretaris statals nias bagndisos cun bunas speisas e gl'è do bungis discurs ve dallas meisas.

Chassot. E dalla parteida er la collaboratoura persunala digl cunseglar federal, Gianna Luzio.

Infurmaziun d'amprem mang

L'introducziun musicala per la visita ò fatg la soprannista Sybille Diethelm, tgi è er neida da maniera spontana spert se da Rapperswil. E cun la sia vusch fegna ò ella do ena curta invista agls ministers dallas pi diversas teras dall'Euro-

pa aint igl rumantsch. En lungatg tgi igls ples vevan ansomma mai santia «live» ed er anc bliers tgi na savevan mianc dalla sia existenza.

Igl havegna ainten la clavadeira digl bagn da Sontga Crousch a Riom ò fatg Isabelle Chassot e preschento an curt igl Festival Cultural Origen tgi ò antras igl premi «Hans-Reinhart-Ring» survagnia l'amprema rancunaschienscha da muntada naziunala per prestaziuns extraordinarias segl camp da teater (chella è eida a Giovanni Netzer). Ed ossa cun igl «Wakker-Preis» ègl do ena sagonda rancunaschienscha da muntada naziunala. Chest'eda per gist chel tema tgi igls ministers on tracto an lour dieta, numnadamaintg per la cultura da construcziun. Ed igl spezial vedlonder seia tgi i geia per chella pitschna vischnanchetta muntagnarda ainten ena regiun relativamaintg debbla da structures. «Mintgatant so gist chegl esser la basa per la libertad artistica e per ena nova creativitat», ò managea Giovanni Netzer ainten la sia part d'infurmaziun. El ò er tematiso l'emigraziun dalla gliout dallas valladas muntagnardas, tgi on per part gia success scu pastiziers ed oters mastiers e turnos bagnstants en tant catscheas dalla malancuneia. Sessour èn igls giasts da tot las teras stos anvistos ainten la villa Carisch e da galdeir ainten las steivas las diversas speisas tgi igls cuschniers e patissiers vevan preparo. Sessour èn igls giasts ias sur Gelgia e passos la tor ed on pernotta a Son Murezza ed igl de siva nivan els anavos cun la Retica tras igl Alvra, la stretga dall'UNESCO.



Giovanni Netzer declera ainten la clavadeira a Riom tge tgi igl Festival Cultural Origen è e pertge gist a cò e betg ainten ena metropola.